

敬業堂詩集

冊九

敬業堂詩集卷四十六目錄

夏課集

喜東亭弟滇歸見過

自五月不雨至於六月二首

得雨

橘蠹化蜨

立秋夜雨晨起納涼

秋暑三絕句

題毗陵徐思肖詩卷後四首

七夕前二日同德尹濬安飲東亭齋

二首

秋庭

賦得雨中荷葉終不溼六韻

雨後行田

寄吳少融二十六韻

八月初四日放舟至硤石

西阡桂六韻

南堂桂八韻

偕季方東亭德尹曾三諸兄弟過東林庵

題周少谷杏林雙鹿圖爲老友徐韓奕壽

臨平舟中

虎林與同年許莘埜話舊時初自蜀

歸四首

題安平泉上二首

曾濟蒼遠致秋蘭一本重陽前試花寄詩報之

世棄

吳起君重陽送菊至

後三日邀諸兄弟賞菊席上放歌

少睡

禿筆吟二首

問東亭病

隙光

芝田長子字西山賢而有文游學京

師一病不起旅櫬還家詩以當哭兼慰芝田

冬課吟效擊壤體二首

棄裘

長至

望歲集

元旦喜晴

邑侯陳衡山壽十二韻

正月十八日偕德尹西阡看梅兼邀曾三芝田東洲諸弟同飲花下三首

及門樓敬思自粵西遠寄潯桂

贈杖

補屋海棠萎而復甦偕德尹芝田作用黃山谷體

再次芝田韻一首

聞副相揆公正月初六訃音小詩寄

哀四首

牆角郁李花盛放

連朝風雨園亭海棠零落都盡而瓶中折枝娟然獨秀老夫欲不誇爲佛力其可得乎

芥舟二首次祝尙于原韻

三月三日雨中潘竹村祝尙于周楚和三老人偕赴德尹之招翁源姪不至席上口占寄嘲

重宿寒中書齋

制府滿鵝山同年奉詔巡海道經吾里詩以迎之四首

春盡日雨中招諸兄弟爲櫻筍會

德尹於得樹樓後築屋三楹既成以

詩落之

偶過鴛湖

與靈上人餉龍井雨前茶二首

老友鄭寒村歿後五年其子義門攜愛蓮畫像過余屬題得二絕句

梅雨

德尹第四子滿月詩當祝辭

秋災行

中秋夜與德尹對酌

韻

秋花

盆中草花二種已含蕊矣朝來忽萎
十六夜復與德尹小飲第有詩次其

五雜組九首

古詩四章

敬業堂詩集卷四十六目錄

敬業堂詩集卷四十六

海寧 查慎行 悔餘

夏課集

起丙申五月
盡十二月

長夏家居與德尹約爲書課第方纂輯北史余點勘毛詩注疏中有疑義互相剖析此情不異曩時所增者白髮耳

喜東亭弟滇歸見過

時德尹亦
歸故居

艱辛憐遠別歡喜報初歸万事付彈指一門多拂衣侵晨移爾艇觸熱扣吾扉相對成三老人間此會稀

自五月不雨至於六月二首

一月愁霖數三旬亢旱憂雲從火山出溪挾沸湯流魚鼈潛無所蜩蟬聒不休氣衰尤怕熱計日望新秋

有客京華至爲言赤地同不成驅鬼魅兼恐致螭螽奠瘞神何定精誠感或通仍聞漢廷議策免到三公

得雨

海色昏昏合雷聲隱隱羣情希汜濩天意卽焦枯一溉功雖細千林氣稍蘇
簞車吾且祝不敢笑田夫

橘蠹化蜨

馬縞中華古今注謂蛺蝶一名野蛾生江南甘橘園中不知乃橘蠹所化也

橘蠹凡兩種食心與食葉食葉者速化勢如靈鬼攝

語出關尹子

朝爲蠕蠕蟲暮作

栩栩蝶公然委其蛻雙翅巧開合却向故枝頭飛飛繞三匝漆園方大夢與汝

形相接試問前後身依稀在目睫

立秋夜雨晨起納涼

飛雨灑然過小窗殘月明微風動秋意草木爲先聲故人何方來

樊川詩清一風來故人

笑披衣迎端能起我懶天地非無情取用及須臾寸懷良已盈茲晨不雨旦莫

負鷄三鳴

秋暑三絕句

秋暑不減三伏天杖藜隨我來谿邊跳蛙自得坎井樂上有夕陽高柳蟬

學書遠遜王右軍學弈無過王積薪日長如年大好睡小技何足勞吾神
布幔十幅當檐牙東南好風渾被遮床頭非無蚊虻案上幸少蠅集瓜
題毗陵徐思肖詩卷後四首

郵筒寄我一編詩天然神骨清而奇騷壇家將生有種看取陣前姑蔑旗

宮體徐摛一變新傳家又得石麒麟年來咄咄欲跨竈莫怪阿翁誇向人

戲用東坡

尺牘中語

錢四才華世所稱乃郎筆力亦騫騰

謂同年錢綱庵父子

同鄉遂有兩勁敵詩派今屬南

蘭陵

狎主齊盟事不難並驅應許入蹄攢老夫合退三舍避憑軾試從壁上觀

七夕前二日同德尹濬安飲東亭齋二首

水淺菖蒲港船通皂莢橋爲歡須永日相過復今朝草徑荒初闢桐陰薄漸凋
歸休真上策何待蚤招要

同祖如同父爲兄忝伯兄家貧餘世業官滿得鄉評舊醬調藜糝廚薑芼鱉羹
敬業堂詩集卷四十六

一一中華書局聚

向來疏酒盞一飽累經營

秋庭

秋來無一事物態頗相撩是葉須防蝕無根不耐澆
欹花危露蒂修蔓委風條
滿目皆生意吾庭未寂寥

賦得雨中荷葉終不溼六韻

爾本池中物翻從溼得乾出泥莖濯濯帶雨葉團團散作千聲去
欹留一滴難
高低承翠蓋大小走珠槃
灑脫渾無跡陰晴詎改觀
肯同凡草木漏澤妄思干
雨後行田

水氣一村蛙晨光幾點鴉
蛙風涼病骨衣露涉秋花正爾關農事兼之遠俗譁
桔槔閒挂壁勞苦及東家

寄吳少融二十六韻

時吳宰
壽光

忽忽三年別遙遙異地情
索居雖潦倒結念每迴縈
憶昨同晨夕惟君獨老成
吉人辭樸訥端士意肫誠
踴步寧愁失冲懷敢自盈
授經依北郭請業到西清

榻愧陳蕃設詩容顧況評出攜青鏤管歸傍短燈檠續學承名父高才敵令兄
少融爲梅村先生幼子西齋給諫愛弟向來留著作兩度費咨呈自我辭書局憑誰問客旌九衢

千轍軌万事一基枰他日乘軒鶴當時出谷鶯先鞭輸祖述上第失楊英夜雨
新豐市秋風古灌城得官隨本分爲政且神明側聽衣冠誦如傳襦袴聲科條
煩是累民社寄非輕示俗因奢儉調絃戒改更免教同列忌休矯一時名此外
佳眠食其他簡送迎陳編閒肯廢古道力能撐便欲觀風去殊難抱病行撫躬
憂浩蕩回首歲崢嶸爲報鳴琴宰應憐撤瑟生西河餘痛在雙眼不曾盲

八月初四日放舟至硤石

習嬾常支戶乘涼偶放船渠清瓜蔓水露白稻花天夜氣鳴雞後晴光蕩槳前
地平先見堦高出万家煙

西阡桂六韻

手種西阡桂三年漸看長玉蘭輸舊翠金粟試新黃露重朝流潤牆低遠遞香
婆娑佳月色報會好秋光敢擬栽爲柱差堪署作堂丁寧松檜伴稍待共成行

南堂桂八韻

五桂階庭樹迎秋候蚤催著花多四出得氣必齊開自我先人植仍資造化培
好風香世界涼影月樓臺天上逃斤斧山中混草萊在家僧偶聚不速客頻來
時衍齋東亭
不期而會 豆筴瓜瓢味兄酬第勸盃最宜星露下永夕與徘徊

偕季方東亭德尹曾三諸兄弟過東林庵

北郭吟筇罷東林講席收

憶四十年前陪施文白先生來遊事

能無三宿戀復作五人遊攢掃庭

常潔牋題壁尙留影前香一瓣來往記風流

時坐施法師影堂

題周少谷杏林雙鹿圖爲老友徐韓奕壽

杏爲仙人林鹿是仙人友少谷寫此圖卷舒落吾手愛其粉墨久若新畫义挂
壁濃香熏朝來詩成畫亦往持以贈君兼壽君與君論交從壯盛通介看成徐
邈聖我如麋鹿爾爲羣豐草長林同此性

臨平舟中

作雙白鷺起前汀西望山光的青暗數永和隄畔路

宋趙誼父過臨平時一居人猶號永和隄

橋十里似長亭

虎林與同年許莘堃話舊時初自蜀歸四首

烹鮮滋味定何如叱馭行經萬里餘
今日秋風吹櫂轉江鄉原不少鱸魚
冷曹需次問何司剩許閒編楚道詩
五角六張成底事人間吉日是歸期
旗鼓相當膽氣麤生平事事不曾輸
輸他對我誇年少漆點烏絲一尺須

同年難得況同鄉久別重逢感數長
百五十人餘幾在勸君狂得且須狂

時連聞劉

大山陳巨高李時夏三同年凶問狂得且須狂借用香山成句

題安平泉上二首

自從兩乳垂天目中有神龍不測淵
直到臨平山脉斷尙淳一眼在山泉

我讀咸淳潛守志曾收元祐罪人詩
摩挲一片竹間石好事僧稀問向誰

南宋潛說

友咸淳臨安志云仁和縣安隱院地產曲竹竹間有池名安平泉東坡題詩云按東坡題安平泉七律一首集中失載余曾采入補遺卷中今至泉旁尋碑

碣不得故云

曾濟蒼遠致秋蘭一本重陽前試花寄詩報之

廣文能好事貽我婺州蘭不共三春賞翻從九日看同心如爾少獨立後時難
待作幽人佩清香可耐寒

世棄

世棄身何與身閒分已過讀書新得少見夢故人多黍熟來初釀池荒足敗荷
東籬佳節近不醉擬如何

吳起君重陽送菊至

今歲寒氣蚤應節微有霜

是日霜降節

開門得君書遠致籬下黃瓦盆三十本羅列

成重行端如衆君子正色登我堂吾衰万事慵酌酒不盡觴何以畚佳貺託詩
紀重陽

後三日邀諸兄弟賞菊席上放歌

吾鄙吳生字起君知余雅好忘余貧扁舟送菊乃無酒正及九九清霜辰招呼
近從南北巷假借半出東西隣後庚三日稍稍集義取兄弟不及賓有如田家
大作社杖白頭者凡七人合年四百七十二雁雁排翅魚排鱗天公貺我美風

日歲云莫矣行食新海蝦挾須白出縮蝦蟹負殼紅輪囷木瓢木杓傳父祖中
貯兼味清而醇興來大壯客顏色詩好全得花精神人間所歷皆夢境至樂孰
與田園真勿辭醉插滿頭去一笑正落陶家巾

少睡

秋去寒猶薄冬來夜總長堦前黃葉滿門外朔風狂舊得休心法新傳養目方
癡兒憐少睡檢曆勸移床

禿筆吟二首

久被宣城束縛加鐵梳膠綴老年華耗磨毛遂囊中穎零落江淹夢裏花縱不
封侯追定遠誰能銘冢向長沙畫工掃壁休嫌禿會見麒麟出咄嗟
書不中書觚不觚也曾東抹與西塗姜牙斂手輸雞距虎僕藏鋒讓鼠須墨沼
涸逃蓬館債硯田荒貸管城租免冠一博秦皇笑差勝中山穴處徒

問東亭病

天末清貧吏身還病亦隨用巫真下策勿藥得中醫

語出漢書
藝文志

瘴霧侵肌重冰

霜造物慈入冬思合醪爲爾尙遲遲

毛詩箋入必共族中而居又有祭脯合醪之歡

隙光

隙光野馬去如馳正是先生靜坐時病不求醫吾有命老方學易世無師回思少作雕蟲比轉悔餘波綺麗爲喚起景陽來入夢擲將殘錦乞

去聲丘遲

芝田長子字西山賢而有文游學京師一病不起旅櫬還家詩以當哭

兼慰芝田

天心洵茫昧家運關彼此可憐兩長男相繼俱客死

亡兒歸柩去冬亦於十一月到家

倚閭冰

霰後歸櫬風霜裏割愛難以慈奪情莫若理明明聖賢教五十不致毀父母恩且然矧乃施於子吾本同痛者勸君兼自慰知其無奈何安命而已矣

冬課吟效擊壤體二首

炳燭餘光已可知假饒聞道敢云遲故人問我三冬課六十年前上學時

順治丙申

余七歲方就傳

晝前有易易如何刪後無詩詩倍多更向誰邊討消息水從冰後不生波

棄裘

禦冬年已久毛禿僅皮存等是犬羊羣永辭狐貉溫留之竟安用棄爾似無恩
改作吾何望茅檐去負暄

長至

天地有肅殺微霜爲驅除洎乎冰雪交慘者旋以舒來復子之半始凝履之初
何須當旣剝然後觀盈虛

望歲集

起丁酉正月盡九月

三年來元日連遇風雪歲事不登生理日窘朝來天色晴霽農占其有秋
乎老圃望歲殆同老農也

元旦喜晴

一從朝請廢冰雪博高眠却展山中曆重瞻霽後天兒孫粗識字兄弟繼歸田
此外非吾分隨人望有年

邑侯陳衡山壽十二韻

海角桑麻邑沙灣烏鹵田極知吾土瘠端賴令君賢侯到纔期月民勞已有年
上官頻按部下戶忍施鞭利器無盤錯長才展事權緩征舒積困雇役免齊編
酌劑心良苦橋虔弊悉捐政成單父速名媿太丘傳麗澤三春渥仁風百里宣
初辰花照座佳氣柳含煙里老霞觴後村童篠馬前也應容野史來奏雅琴篇
正月十八日偕德尹西阡看梅兼邀曾三芝田東洲諸弟同飲花下三

首

西麓寒梅樹年年二月開今年開獨早應爲兩人來
已是四回看憐渠閱歲寒同時手栽者松柏長偏難
隨意致芳鄰壺餐勝觥飯尊前一校點且喜人皆健

及門樓敬思自粵西遠寄潯桂

隔年一信到何遲寄我潯州菌桂皮已向籠中儲上藥只愁天下少良醫情深
遠荷門生致性在終於野老宜別與蘇家傳釀法搗香篩辣味尤奇

贈杖